



Broj: 03/3-50-1-97-6/08
Sarajevo, 24.10.2008. godine

Z A P I S N I K
6. sjednice Zajedničke komisije za ekonomske reforme i razvoj oba doma
Parlamentarne skupštine Bosne i Hercegovine,
održane 22.10.2008. godine

Sjednica je počela u 09.00 sati.

Sjednicom je predsjedavao g. Drago Ljubičić, predsjedavajući Komisije.

Sjednici su prisustvovali: g. Bajazit Jašarević, g. Mehmed Suljkanović, g. Ivo Miro Jović, g. Hazim Rančić, g. Slobodan Šaraba, g. Adem Ibrahimpašić, g. Hadži Jovan Mitrović, gđa. Azra Hadžiahmetović, Rifat Dolić, članovi Komisije.

Sjednici su prisustvovali: gđa. Azemina Vuković, Pomoćnica direktorice Direkcije za ekonomsko planiranje BiH i g. Amer Bekrić, sekretar Zajedničke komisije za ekonomske reforme i razvoj oba doma Parlamentarne skupštine Bosne i Hercegovine, te g. Zoran Brkić iz Sektora za odnose sa javnošću.

Za sjednicu je predložen i jednoglasno usvojen sljedeći

D N E V N I R E D

1. Usvajanje Zapisnika 5. sjednice Zajedničke komisije,
2. Konačni izvještaj o provođenju mjera iz Akcionog plana Srednjoročne razvojne strategije BiH 2004. – 2007. godine (PRSP) i Ekonomski trendovi, godišnji izvještaj za 2007. godinu Direkcije za ekonomsko planiranje BiH,
3. Informacija o sastanku predstavnika Zajedničke komisije za ekonomske reforme i razvoj Parlamentarne skupštine Bosne i Hercegovine sa Akhtarom Chaudhryem, članom Parlamenta Kraljevine Norveške,
4. Tekuća pitanja.

Ad.1.

Usvajanje Zapisnika 5. sjednice Zajedničke komisije za ekonomske reforme i razvoj

Zapisnik 5. sjednice Zajedničke komisije za ekonomske reforme i razvoj jednoglasno je usvojen, bez primjedbi.

Ad.2.

Konačni izvještaj o provođenju mjera iz Akcionog plana Srednjoročne razvojne strategije BiH 2004. – 2007. godine (PRSP) i Ekonomski trendovi, godišnji izvještaj za 2007. godinu Direkcije za ekonomsko planiranje BiH

Gđa. Azemina Vuković je izrazila zadovoljstvo činjenicom da su Zajednička komisija za ekonomske reforme i razvoj i Direkcija za ekonomsko planiranje (DEP) uspostavili direktnu vezu i suradnju. DEP je, u skladu sa zaključkom sa prethodnog sastanka, bio u obavezi da dostavi finalni izvještaj koji se odnosi na rezultate implementacije prethodne Strategije razvoja, što je i učinjeno. Naglasila je da predstavljanje Izvještaja o implementaciji Zajedničkoj komisiji za ekonomske reforme i razvoj slijedi nakon završetka faze oficijelnog praćenja implementacije Srednjoročne razvojne strategije (PRSP-a), koje je završilo u decembru 2007. godine. PRSP je prvi dokument pripremljen na državnom nivou, za koji je osiguran monitoring i priprema izvještaja, evidentirano je ono što je urađeno da bi se vidjelo šta je potrebno dalje činiti. Izvještaji su pripremani na polugodišnjoj bazi, pripremljeno ih je šest, a sedmi, završni, je pripreman sa nešto izmijenjenom metodologijom, uzimajući u obzir i kontekst, kako političkog, tako i ekonomskog okruženja. Prethodno je održano šest radionica na kojima je Izvještaj prezentiran nevladinom, vladinom sektoru, kao i biznisu, a na kome se diskutovalo o šest prioriteta iz PRSP-a. U Izvještaju je tretirana realizacija 969 mjera iz PRSP-a, od kojih je oko 60% blagovremeno implementirano, 32% mjera je u nekoj od faza implementacije, dok se u 8% slučajeva sa implementacijom mjera još nije ni startovalo. Zacrtae a neimplementirane strateške mjere će biti ponovo razmotrene i ukoliko se ocijene prioritarnim reformskim procesima, biće uključene u nove strateške dokumente - Strategiju razvoja BiH 2008.-2013. i Strategiju socijalne uključenosti BiH za isti period, koji su u procesu pripreme. Metodološki pristup izradi nove Strategije, prema načinu projekcije trendova, je unaprijeđen. Pripremljena je situaciona analiza sa prijedlogom ciljeva koji treba da se usvoji na Koordinacionom odboru za ekonomske reforme i evropske integracije, pripremljene su Svot radionice i radi se na pripremi za tri scenarija, koja se uvijek rade prilikom izrade ovih strateških dokumenata – dubok se zagazilo u proces pripreme novih strateških dokumenata. Vezano za prethodnu strategiju, nakon što je prošla godina dana oficijelnog praćenja implementacije mjera PRSP-a, potrebno je krajem godine pripremiti još jedan Izvještaj koji će nas uputiti na to da li se stanje promijenilo. Ovdje imamo dokument koji nam može dati dosta argumenata da sagledamo ukupno stanje i imamo Ekonomske trendove, dokument koji DEP priprema redovno na kvartalnom nivou, ovdje se govori o godišnjem izvještaju koji je mnogo kvalitetniji i napravljen je napredak i zajedno sa ovim strateškim dokumentima koje DEP radi, predstavlja zaokružen proces. DEP je, zbog objektivnih razloga imao mali zastoj u aktivnostima, a sada je bitno da se izgradi saradnja sa Zajedničkom komisijom za ekonomske reforme i razvoj prema kojoj će DEP aktivno nastupiti.

G. Drago Ljubičić je otvarajući diskusiju, rekao da je dokument obuhvatio dosta toga i ukazao da pred bosanskohercegovačkim institucijama na državnom i entitetskom nivou stoji mnogo posla i obaveza. Podatak da je prethodna PRSP obuhvatala 969 mjera govori sam za sebe. Podržao je jasno i konkretno izlaganje gđe. Vuković.

Gđa. Azra Hadžiahmetović je, u vezi ekonomske strategije za naredni period, postavila pitanje, da li se, u odnosu na ono što je kao kontura bilo utvrđeno u okviru PRSP-a, radi na korekcijama ključnih ekonomskih agregata, imajući u vidu da sve zemlje u svijetu korigiraju projicirani ekonomski rast zbog aktualnih dešavanja u svjetskoj ekonomiji.

Gđa. Azemina Vuković je potvrdno odgovorila, naglasivši da se radi po metodologiji Evropske unije i Svjetske Banke. DEP raspolaže potpuno svježim informacijama koje se interaktivno posmatraju, sektori se ne posmatraju odvojeno. U okviru DEP-a egzistira Sektor za ekonomska istraživanja koji priprema potrebne osnove i ekonomske trendove, te prati šta se dešava i to se ugrađuje u proces izrade strateških dokumenata. Podvukla je da se rade tri scenarija: pesimistički, realni i optimistički i to je osnova na kojoj će se pripremiti i dodatna, naknadna evaluacija procesa.

Gđa. Azra Hadžiahmetović je postavila pitanje odnosa Vijeća ministara BiH i nadležnih institucija prema DEP-u, na koji način se ostvaruje komunikacija i da li se uvažavaju stavovi i mišljenja DEP-a.

Gđa. Azemina Vuković se pohvalno izrazila o saradnji sa VM BiH i njegovom odnosu prema DEP-u, ostvarenoj saradnji sa Koordinacionim odborom za ekonomske reforme i europske integracije. Rad DEP-a nije mogao ni početi bez saglasnosti Predsjedavajućeg VM BiH, Premijera entitetskih vlada, Gradonačelnika Brčko Distrikta Bosne i Hercegovine i Ministara finansija. Mali zastoj u radu i u kontaktima bio je vezan za period izbora u BiH, a sada su ponovo bili u Republici Srpskoj i aktivnosti i rad je ponovo intenziviran. Imaju podršku i nada se da će tako ostati i ubuduće.

G. Ivo Miro Jović smatra da se radi o dokumentu od iznimne važnosti za Zajedničku komisiju za ekonomske reforme i razvoj, cjelokupnu PS BiH, VM BiH i ostale činioce koji promišljaju o budućnosti, a za koje on mora biti polazna osnova. Dokument je razrađen, studiozan, sa elementima uporednih pokazatelja. Raduje ga da vidi kako je DEP izrastao iz Jedinice za koordinaciju ekonomskog istraživanja. Pohvalno se izrazio o kreiranju politika na temelju činjenica što je danas rijetkost. DEP radi posao koji ne trpi nerad niti friziranje podataka za fokusiranje na budućnost, a ima veću odgovornost, tim više jer se njegov rad nadzire od strane relevantnih faktora. Izrazio je žaljenje što Konačni izvještaj o provođenju mjera iz Akcionog plana Srednjoročne razvojne strategije BiH 2004. – 2007. godine (PRSP) i Ekonomski trendovi, godišnji izvještaj za 2007. godinu, nije predstavljen prije nego što je (na prethodnoj sjednici) razmatran Program rada Direkcije za ekonomsko planiranje BiH, jer bi to proizlazilo jedno iz drugog. Pohvalno se izrazio o dostavljenom dokumentu jer isti naznačava nužne elemente u oblasti razvoja društva i šta se treba raditi u okviru procesa približavanje Europskoj uniji. Kao primjer je naveo elaboraciju stanja u rudnicima u BiH i rudnik koji je nakon privatizacije tri puta povećao proizvodnju, nasuprot malih plaća i male proizvodnje u drugim rudnicima, te smatra da taj primjer treba biti putokaz šta treba raditi. U smislu poboljšanja rada PS BiH, preporučuje da se stvori mogućnost da zainteresirani parlamentarci i drugi detaljnije razgovaraju o dostavljenim dokumentima, ne samo iz oblasti ekonomije, nego u fokusu na ukupnu društvenu zajednicu i općenito u smislu donošenja propisa. Bilo bi dobro, a DEP je i obećao, organizirati posjetu Zajedničke komisije Direkciji i okrugli stol sa stručnim ljudima kako bi analizirali materijale koji počivaju na činjenicama, kako bi mogli napraviti ozbiljnu studiju koja bi poslužila u boljem i drugačijem svjetlu razmišljanja parlamentaraca kod donošenja zakona.

Gđa. Azemina Vuković se zahvalila na ljubaznim riječima i naglasila da je ranije, a što je i konstatovano u DEP-ovim dokumentima, nedostajala saradnja sa PS BiH i koordinacija sa parlamentarnim tijelima, a da je otpočinjanjem rada Zajedničke komisije za ekonomske reforme i razvoj stvorena pretpostavka organizirane suradnje. Sa zadovoljstvom prihvatila ideju da DEP organizira jednu posjetu i okrugli stol, da bi se detaljno analizirali dokumenti i da bi se vidjelo kako dalje.

G. Ivo Miro Jović smatra da, budući da je PRSP okončana, prilikom rada na novim dokumentima treba razmisliti, a što je njegova sugesija, da se kod donošenja zakona iz oblasti ekonomije obezbijedi mišljenje DEP-a na analogan način kako se obezbjeđuje mišljenje Direkcije za Europske integracije o usklađenosti zakonskih rješenja sa zakonodavstvom europske unije.

G. Drago Ljubičić se pridružuje ovim komentarima i prijedlogu. Također predlaže da se prilikom organizacije okruglog stola pozovu svi relevantni faktori koji su učestvovali u pripremi, implementaciji i monitoringu PRSP-a. Također, postavio je pitanje kome su sve dostavljeni materijali koji su predmet današnje rasprave i tražio je komentar u vezi uzajamnosti izrade strategije i popisa u Bosni i Hercegovini.

Gđa. Azemina Vuković je odgovorila da su materijali, u procesu izrade izvještaja o monitoringu, dostavljeni širem krugu, i to parlamentima u BiH, Vijeću ministara BiH, entitetskim vladama i vladi Brčko Distrikta BiH, nevladinom sektoru, privrednoj komori i td. U vezi popisa, smatra da je isti veoma značajan, kako bi se imali relevantni podaci o broju stanovnika u BiH, elaborirajući to navodima da su početkom izrade PRSP-a u 2002. godini, korišteni podaci van BH statističkog sistema, da je u 2006. godini, u zavisnosti od obrađivača, došlo do variranja podataka o broju stanovnika u BiH između 3,5 i 4,1 milion stanovnika, da sada Agencija za statistiku BiH operira sa podatkom od cca.

3.832.000 stanovnika, ali da se i tu radi o procjeni, što sve otežava kvalitetnu statističku obradu podataka. Također je naglasila da statistički sistem nije komaptibilan sa statističkim sistemima okruženja, prevashodno sa statističkim sistemom zemalja EU, tako i da su sami statistički pokazatelji teško uporedivi.

G. Hadži Jovan Mitrović smatra da dostavljeni materijal, zbog daljih koraka, treba biti dobro razmotren i prokomentarisan, da zaslužuje dobru raspravu na Komisiji i slaže se da treba organizovati okrugli stol. Pominjući podatak o 60% implementiranih mjera, naglašava da, zbog različite specifične težine, nije svejedno koje su to mjere implementirane, a koje nisu. Osvrćući se na procese privatizacije malih i srednjih preduzeća, na svim nivoima u BiH, smatra da one imaju pozitivnih, ali i negativnih rezultata, da su privatizirani neki privredni subjekti koji nisu trebali biti privatizirani, i da to za posljedicu ima pojavu mita i korupcije, a da Agencije za privatizaciju ne funkcioniraju u javnom interesu. Smatra nelogičnim da su privatizirana javna preduzeća od opšteg interesa, koja ujedno imaju i socijalnu ulogu. Kao primjer preduzeća, za koji smatra da nije trebalo da se privatizuje, i čija privatizacija ima negativne posljedice, navodi privatizaciju fabrike glinice Birač iz Zvornika, u kojoj je došlo do otpuštanja dvije stotine radnika, otpustiće se još dvije stotine radnika, investitori će otići i ostaće industrijsko groblje. Smatra da se o tome treba voditi računa na svim nivoima u BiH.

G. Adem Ibrahimpašić smatra da se treba fokusirati na pitanje rasta inostranih ulaganja, da su direktne investicije rijetke, a da nam upravo to treba. Osvrćući se na razgovore sa parlamentarcima i privrednicima prilikom posjete Zajedničke komisije pokrajini Baden Wurtemberg, naveo je da je na pitanje zašto se blokovi motora za Mercedese ne izrađuju u Famosu, nego u Rumuniji, dobio odgovor, da razlozi za to ne leže u nestručnosti ili skupoj radnoj snazi u BiH, nego isključivo u percepciji BiH kao nesigurne zemlje. Konstatovao je da se jako malo radi na razbijanju percepcije o nesigurnosti ulaganja u BiH, te smatra da je dobro da se organizuje okrugli stol i da se akcenat stavi na ovo pitanje.

G. Bajazit Jašarević smatra da treba, kao zaključak, predložiti da se predstavljeni materijal razmotri i usvoji na domovima PS BiH, da je okrugli stol dobrodošao, to podržava, ali smatra da to nije uslov da se materijal uputi u parlamentarnu proceduru, da treba da se sa njim upoznaju svi poslanici i da se o tome javno progovori, a da zajedno ove rasprave posluže kako bi, u sljedećem periodu, BiH dobila ono što joj treba.

G. Amer Bekrić, sekretar je pojasnio da je materijal, sa mišljenjem, moguće uputiti u parlamentarnu proceduru, kako bi ga oba Doma PS BiH primila k znaju, te da je na Domovima moguće voditi raspravu o materijalu, uzimajući u obzir da DEP, kao organ Vijeća ministara BiH, zadaću izrade PRSP-a nije dobio od Parlamentarne Skupštine BiH.

Gđa. Azra Hadžiahmetović je postavila pitanje kada se očekuje prvi draft prijedloga nove razvojne strategije i smatra da bi bilo uputno objediniti oba dokumenta i uputiti ih na razmatranje, kako bi oba Doma PS BiH vodila zajedničku raspravu na temu ekonomske problematike.

Gđa. Azemina Vuković je prisutnim skrenula pažnju da se prethodnim diskusijama izašlo iz sfere monitoringa, te zašlo u sferu evaluacije dokumenta, što traži kontakte sa lokalnom zajednicom radi pribavljanja direktnih informacija o procjeni efekata onoga što je urađeno kroz PRSP-a, a što nije rađeno iz razloga što su za to potrebni mnogo veći kapaciteti od onih kojima DEP trenutno raspolaže, te da je odlučeno da se radi i ex ante evaluacija, a da se prvi draft strategije očekuje oko mart mjeseca naredne godine.

G. Ivo Miro Jović smatra da se treba fokusirati na pitanje šta je, u okviru zakonodavstva, moguće učiniti na stvaranju ambijenta za uspješnije i bolje poslovanje.

Nakon provedene rasprave jednoglasno su usvojeni sljedeći **ZAKLJUČCI**:

1. Zajednička komisija za ekonomske reforme i razvoj pozitivno se izjasnila o materijalu Direkcije za ekonomsko planiranje BiH pod nazivom: „Konačni izvještaj o provođenju mjera iz Akcionog plana Srednjoročne razvojne strategije BiH 2004 – 2007. godine (PRSP) i Ekonomski trendovi, godišnji izvještaj za 2007. godinu;

2. U dogovoru sa Direkcijom za ekonomsko planiranje BiH, biće organizovan okrugli sto, na kojem će se o navedenom materijalu raspravljati u širem kontekstu, i na koji će, osim poslanika i delegata Parlamentarne skupštine BiH, biti pozvani relevantni faktori, koji su učestvovali u pripremi, sprovođenju i monitoringu PRSP-a.
3. Nezavisno od organizacije okruglog stola, predmetni materijal biće upućen u parlamentarnu proceduru.“

Ad.3.

Informacija o sastanku predstavnika Zajedničke komisije za ekonomske reforme i razvoj Parlamentarne skupštine Bosne i Hercegovine sa Akhtarom Chaudhryem, članom Parlamenta Kraljevine Norveške.

G. Drago Ljubičić je prisutne upoznao sa održanim sastankom predstavnika Zajedničke komisije za ekonomske reforme i razvoj Parlamentarne skupštine Bosne i Hercegovine sa Akhtarom Chaudhryem, članom Parlamenta Kraljevine Norveške. Po ovoj tački dnevnog reda nije vođena diskusija a Informacija je primljena k znanju bez primjedbi.

Ad. 4.

Tekuća pitanja

Pod ovom tačkom dnevnog reda nije bilo rasprave.

Sjednica je završena u 10,00 sati.

Sekretar Komisije

Amer Bekrić

Predsjedavajući Komisije

Drago Ljubičić